


3



浙江通志卷二十九

官師志第五之九

王綸字德言建康人紹興五年進士爲婺州臨安府  
教授權國子正時初建太學無舊規吏緣爲姦綸釐  
正之歷除同知樞密院事金將渝盟邊報沓至綸乞  
備禦已而金且卽盟乃以綸爲稱謝使至金金主連  
發數問綸條對不屈尋還朝言鄰國恭順和好宰臣  
湯思退等皆賀已而疾作乞外遷知建康敵犯江綸  
每以守禦利害驛聞上多從之卒謚章敏

王倫字正道莘縣人文正公旦之從玄孫也家貧無



行爲任俠往來京洛間數犯戾建炎初選能專對者使金倫乃預選往與粘罕反覆議和縱之歸紹興二年秋倫至臨安入對言金人情僞甚悉上優獎之除脩撰主管杭州萬壽觀已而往復使金金主遣張通古爲江南詔諭使偕倫來朝論以金使肆嫚多歸罪倫倫泣曰倫涉萬死一生往來虎口者數四今日乃責倫如此遂復與通古議許歸梓宮太母及河南地倫乃復如金金拘倫河間六載欲授以平灤三路都轉運使倫曰奉命而來非降也金益脅以威倫遂冠帶南向再拜慟哭曰先臣文正公以直道輔相兩朝

天下所知臣今將命被留欲汙以僞職臣敢死以辱命遂就死於是河間地震雨雹三日不止人皆哀之論者謂倫雖市井無賴使金屢被拘留脅以僞官乃竟不受而死當日胡銓之疏豈亦有激于秦檜孫近而云然耶

王次翁字慶會濟南人試禮部第一歷婺州教授知處州乞祠歸寓于婺秦檜召還道出婺次翁見之檜居朝遂援引次翁歷官至御史中丞知趙鼎與檜不協遂論罷鼎官鼎歸會稽上書言時政檜忌鼎復用乃令次翁又言之乞顯置于法尋除次翁叅知政事



時兩浙牒試主司觀望檜與次翁子姪預選者數人  
士論大駭檜擅國十九年凡居政府者莫不以微忤  
黜去終始不二者惟次翁耳

陳康伯字長卿信之弋陽人中上舍丙科通判衢州  
攝邵事盜發白馬原康伯督州兵濟王師進討克之  
累遷戶部郎中康伯與秦檜太學有舊檜當國康伯  
在郎省五年泊然無求後因金使至詔康伯爲館伴  
端午賜扇與論拜受禮言者以生事論罷檜死起知  
漢州歷官至尚書左僕射

邵文炳紹興間爲於潛令興水利減山鄉折米價遷

中書民懷其德政建祠于縣南與丞相葉衡同祀

朱勝非字藏一蔡州人崇寧二年上舍登第建炎初  
試中書紹興初知紹興府時呂頤浩初領都督江淮  
諸軍之命已而悔之稱疾不進乃引勝非代爲都督  
給事中胡安國奏勝非先與黃潛善汪伯彥同在政  
府緘默附會馴致渡江尊用張邦昌結好金虜及正  
位冢司苗劉肆逆貪生苟容辱及君父今強敵憑陵  
用人得失繫國安危深恐勝非上誤大計乃罷都督  
之命改兼侍讀仍知紹興

王德字子華通遠軍人建炎初從劉光世勤王爲前



軍統制秦檜忌其英勇罷爲浙東副總管善謀有膽所向無敵先是從熙帥姚古擒隆德府僞守姚太師獻于朝欽宗問狀姚曰臣就縛時止見一夜叉耳時遂號爲王夜叉

張子益字德高其先鳳翔人後徙秦州初從韓世忠捕苗傅補承信郎紹興間累官兩浙西路馬步軍都總管智識過人謀慮精審屢有戰功虜人號爲小鐵

山

洪擬字成季丹陽人舉進士歷知溫州有治劇才宣撫使孟庾討閩寇過郡命擬犒師甚急擬借封

用之已乃自劾詔褒其知變

蔣行簡字仲可永嘉人進士歷明州市舶監紹興中知海鹽有聲實還朝獻所著樞言五十篇通判興國軍知處州聞趙汝愚謫死遂感疾不起

潘大臨字舜舉嘗以兩浙運司主管文字官攝溫州獲海寇五十閱其實釋無辜者半復以太府寺丞出權真州茶鹽時相丁大全使人諷之曰有羨獻即受賞大臨曰吾一錢皆籍縣官羨於何取大全怒馳代者夜半奪印去

胡沂字周伯餘姚人進士甲科紹興間爲秀州軍事



推官當播遷之餘民窮盜起獄訟繁滋沂一以忠厚臨之而不廢發摘郡賴以安改宣州教授終禮部尚書爲名臣謚獻簡

賈廷佐東陽人高宗時爲桐廬主簿紹興十二年秦檜復相專主和議廷佐上疏論檜辭甚切直而史不載其七世孫權出以示人世之士大夫爲文以稱其忠廷佐之名始顯于天下事在本朝宋濂文集景定諫疏序中

黃楊紹興間知崇德縣治燬于建炎已二十年楊至營構之事集而民不擾

沈某字少潛常熟人紹興中知海鹽治學宮築海二十里民有宿逋檢點藏得羨餘悉爲代輸郡有獄一時平反

臧梓紹興間爲壽昌令循良清謹字民有道殿中侍御史張絢以聞旣核實令再任以觀政績高宗曰若得賢令如此一方皆受其惠非細事也趙鼎對曰一縣生靈十萬縣令得人則皆安業上曰然朕區擇監司守令政欲安日姓也旣而教化大行爲三輔最汪藻字彥章饒州德興人舉進士調婺州觀察推官進龍圖閣直學士知湖州上言欲集元符庚辰至宣



和乙巳詔旨爲日曆制可詔賜資錢聽辟屬編類越  
二年書成凡六百六十五卷上之熈升顯謨閣學士  
遣使賜賚其屬鮑延祖五處義咸增秩有差時胡伸  
亦有文名時人爲之語曰江左二寶胡伸汪藻其後  
言者論藻嘗爲蔡京王黼門客奪職

陳之茂字卓卿無錫人紹興中知湖州爲政嚴肅時  
金人寇邊之茂脩城治器械聚糧食東南士大夫挈  
家依之

周宗字彥廣湖州人紹興中守滁陽濠梁淮楚宗爲  
之約束結保伍民賴以全活者甚衆兩淮流民多

知臨安上言自古風化必自近始陛下躬履  
節儉而貴近奢靡殊不知革乃陳禁革十五事上意  
納之

劉清之字子澄先世臨江人後徙吉之廬陵舉紹興  
進士爲建德主簿欲應博學宏詞科及見朱熹卽盡  
取所習詞業焚之慨然志於理學及遷秩歸至呂祖  
謙書院講論經義留數月乃去時張栻守嚴陵尚未  
識清之已乃知之往復論議遂相孚契清之天分旣  
高所學日益造詣遂成鉅儒後知常州改衡州當路  
惡之諷言者論罷及卒朱子爲文祭之日子澄立志



高雅信道深堅居閒則講道著書樂衆人之所不樂  
從官則養民善俗憂衆人之所不憂賢者與之遊則  
常幸其有思齊聞過之益不賢者與之處則常病其  
有明污招過之羞然世之賢者少而不賢者多是以  
子澄之得譽寡而蒙毀衆道不行於一州而遂齎志  
以沒也是豈不可爲之深悲而痛恨也邪

吳表臣字正仲永嘉人少從周行已學與兄鼎臣同  
舉大觀進士高宗至永嘉訪求人材因用趙鼎薦召  
對于江心寺稱旨除監察御史扈從還越遷右正言  
原吏部尚書翰林學士秦檜欲使金議地界請政事

帝曰歸來可坐此表臣不答坐罷起知婺州進敷文  
閣待制乞祠祠滿再除知婺州清約自持復請祠以  
全晚節檜怒命言者劾罷之

胡寅字明仲建寧人文定公安國之子也學者稱爲  
致堂先生紹興六年以徽猷閣待制知睦州政教並  
行民用胥勸明年文定公自衡山抵書曰汝在桐江  
一年矣大凡從官作郡一年未遷卽有怠意汝宜作  
三年計日勤一日思遠大之業未幾移知永州

胡寧字和仲以蔭補官秦檜召試館職除敕令所刪  
定官秦熈知樞密院事檜問寧曰熈近除外議事云



何寧曰外議以爲相公必不爲蔡京之所爲也遷大常丞祠部郎官主管台州崇道觀卒安國之傳春秋也修纂檢討多出寧手寧又著春秋通旨以羽翼其書云

楊大異字同伯醴陵人嘉定十三年進士調龍泉縣尉攝縣事適歲飢提刑司遣吏和糴米一萬石于邑米價頓增民乏食大異卽以提刑司所糴者如價發糴民甚德之提刑趙與憲大怒坐以方命謫安遠招降峒寇所至有惠政

劉大中字立道貞州人紹興七年自兵部尚書知處

州在任激濁揚清抑強扶弱所部肅然初民輸秋租監官恣下漁取大中令輸戶自解吏不能爲擾未幾召還除禮部尚書尋再知處州乞祠提舉臨安洞霄宮

秦檜字會之江陵人政和進士靖康元年汴京失守金人議立張邦昌御史馬伸言于朝檜亦抗疏以爲不可胡安國深信之及從徽欽北行南還力主和議高宗遂拜爲相胡安國游酢等皆爲所愚和遂以定紹興六年以觀文殿學士知會稽卽召赴闕獨相十九年方岳飛偃城屢捷檜蠹惑高宗以十二金牌召



還與万侯高誣成飛獄天下寃之

孫近紹興六年以龍圖閣學士知會稽八年十一月召爲參知政事胡銓上疏論王倫因及近謂近附會秦檜和議遂得參政漫不敢可否事參贊大臣徒取充位如此亦可斬也

汪待舉字懷忠衢州人紹興中知處州爲政寬厚曲盡下情民有爭訟呼之使前面究曲直不以屬吏故庭無留事箠楚罕用百姓以詩頌之曰官舍却如僧舍靜吏人渾似野人閒時部民嘗有以酒飲客者客醉且卧空舍中主人慮其去又從而鑰之客夜酒渴

漿不可得則取花瓶水飲之次日啓鑰客已死矣其家訟于官公究其一時舍中所有物惟瓶浸旱蓮而已試以飲極刑囚果死訟乃白其明察如此

沈樞安吉人舉進士調彭澤丞用葉義問薦賜對首論君子小人之辯高宗嘉之除監察御史坐不附楊邦彥獲譴貶端州尋起知温州

葉顥字子昂莆田人紹興中自司農寺丞出守衢州明習法令吏不能欺待下以嚴儉屬敬畏先有詔減民間屋租之半官吏視爲虛文奉行不虔至是悉與蠲免民始蒙實惠時有青田令獻羨錢百萬公詰其



錢自何來命以所屬代本縣民戶輸納夏稅民益感之  
成無玷字士慤武康人少有才氣善文崇寧四年夏  
趙懷德舉國効順無玷撰端門受降頌以獻之徽宗  
覽而褒之明年賜進士及第調江山令宰相李綱薦  
其文武才畧召對除刪定官紹興初金人犯順呂頤  
浩復薦守鄂州修築城壘教閱士伍與士卒死守抱  
病而歿朝野惜之

葉紹聞人紹興十七年知龍泉令行禁止訟牒至庭  
均見誠僞民所爭辨必曉之以理委曲開諭其抵罪  
者咸自輸服習俗好爭紹教以懲忿息怒全身養之  
率多感化先是邑佐括民老病以爲隱丁抑之輸  
縮驗而免之邑人至今頌其遺愛

洪遵字景嚴樂平人皓仲子也自見時端重如成人  
從師業文不以歲時寒暑輟文留沙漠母亡遵孺慕  
攀號既葬兄弟卽僧舍肄業夜枕不解衣以父蔭補  
承務郎與兄适同試博學宏詞科中魁選賜進士出  
身高宗以皓遠使擢爲秘書省正字中興以來詞科  
中選卽入館自遵始宰相秦檜子嬉爲長官謦欬爲  
人輕重遵恬然不附麗二年弗遷皓南還與朝論異



出守遂乞外通判常娶越三州所至有惠政後知平江金人由海道窺二浙助副總管李寶禦之成功孝宗時拜同知樞密事知建康府淳熙元年以資政殿學士提舉洞霄宮卒謚文安

洪邁樂平人皓季子中博學宏詞科紹興末假翰林學士使金書用敵國禮金人怒鎖使館後得還孝宗卽位拜中書舍人直學士院後知婺州紹興皆有善政以端明殿學士致仕卒謚文敏所著有容齋隨筆夷堅志

陳良翰字邦彥臨海人紹興五年進士知瑞安縣有

惠政累官左司諫疏論湯思退奸邪張浚精忠出建寧府後以敷文閣直學士奉祠良翰在朝論諫純正卒謚獻肅

仇愈字泰然益都人大觀中進士歷知明州挫豪強獎善良吏受賕雖一錢不貸姦猾斂迹州罹兵火旣燬愈斥厨錢助其費歲饑發官儲減直以糶民無死徙朝廷聞之進秩一等再召進對上親加褒諭再知明州愈在明州嘗欲薦一幕官問曰君日費幾何對以十口之家日用二千愈驚曰吾爲郡守費不及此屬僚所費倍之安得不貪遂止



楊獬新喻人紹興間舉進士知吉水救荒有政累官  
司農少卿知明州沿海有小寇獬悉擒之海道晏然  
生平廉介自持博覽強記爲後學所歸法鄉人至今  
祠之於學

游九功建陽人紹興中知慶元有古循吏風

王淮字季海婺州人由台州臨海縣尉至淳熙八年  
拜右丞相逮事光宗初朱熹爲浙東提舉淮寔薦之  
熹後劾知台州唐仲友淮素善仲友遂不相協乃擢  
陳賈爲監察御史俾上疏言近日道學假名濟僞請  
革之鄭丙爲吏部尚書相與叶力攻道學章

以奉祠遂啓慶元道學之禁

李浩字德遠臨川人早有文名尤深理學紹興中登  
第除吏部郎應詔直言無所避忌知台州軍士謀亂  
浩一語卽定孝宗特用爲廣西帥轉吏部侍郎

尤袤字延之常州無錫人紹興進士知台州前守趙  
汝愚修郡城工纜什三屬袤成之築加高厚明年大  
水城賴以不沒有毀袤者高宗疑之使人密察民頌  
其善政不絕口孝宗嘗語宰執曰尤袤甚好前此無  
一人言之何也詔直學士院光宗卽位言者以爲周  
必大黨遂與祠時國事多舛袤積憂成疾卒



朱倬字漢章閩縣人舉進士張浚薦于朝與秦檜忤  
出教授越州梁汝嘉制置浙東表攝參謀有群寇就  
擒屬倬鞠問獨竄二人餘釋不問曰此饑民剽食耳  
烏可盡繩以法遷國子監丞除浙西提舉召對高宗  
曰人不知卿朕獨知卿除右正言嘗曰人主任以其  
目非報怨任氣之地每上疏輒夙興露告若上帝鑒  
臨紹興三十一年拜尚書右僕射金兵犯江陳戰備  
應三策又策敵必妄意絕江果如所料史浩虞允文  
王淮陳俊卿劉珙之進用皆倬所薦也

剛中字亨仲金華人舉進士紹興間通判溫州

事敢為善籌策歲大饑出俸勸糶流民甚衆饑民反  
實惠初剛中由秦檜薦于朝檜主和議剛中不敢言  
既剛中為四川宣撫使事多專擅忤檜徙封州卒  
汪應辰字聖錫信州玉山人紹興進士第一時秦檜  
力主和議應辰上疏論檜大不悅遂請祠以歸寓居  
常山之永年院益以修身講學為事浩然之氣不為  
少屈張九成謫邵州交遊皆絕應辰時加通問人皆  
危之趙鼎貶死朱崖應辰為文祭之日惟公兩登上  
宰皆值艱危之時一斥南荒遂為生死之別事已定  
於蓋棺恩特榮於歸骨衢守章傑希檜意指應辰為



阿附死黨徧鞠之胡寅言乃寢檜又欲殺張浚事逮  
應辰檜死幸免召為吏部郎官以母老乞外出知婺  
州仕終端明殿學士應辰流落嶺嶠十有七年少從  
呂居仁胡安國遊張栻呂祖謙劉珙深器許之

范寅孫姑蘇人文正公之曾孫也紹興十七年為平  
陽縣丞治政勤能急于民事興修水利人多賴之  
曾幾字吉父其先穎人徙河南禮部侍郎開之弟也  
試吏部銓中優等賜上舍出身擢國子學正時禁元  
祐學術甚厲而以剽掇熟爛為文博士弟子更相授  
受公獨憤歎思一洗之一日得經義絕倫者出其

誦之公卿聳聽稱善乃內舍生陳元有作也元有遂  
錄用文體為之少變歷兩浙西路提點刑獄時秦檜  
用事怒開幾亦罷寓上饒七年讀書賦詩蓋將終焉  
紹興二十五年起提點兩浙東路刑獄幾時已老而  
精明不衰去大猷吏張鎬一路稱快明年知台州禁  
戢豪右尋授秘書少監歷禮部侍郎隆興二年上章  
謝事遷左通議大夫致仕乾道二年年八十三卒謚  
文清有集三十五卷

范成大字致能吳縣人紹興進士隆興中出使金國  
竭節盡忠累官叅知政事出知明州乾道中知處州



所至留心民事水利橋梁無不脩舉以資政殿大學士奉祠成大素有文名尤工於詩所著有石湖集攬轡錄騷鸞錄虞衡志吳舡錄

楊愿字原仲歷新昌縣丞越州判官奏檜薦之召改樞密院編脩官登紹興二年制科進士遷計議官召試館職罷主管崇道觀復除秘書郎議者謂外任未終改通判明州

胡瑄晉陵人宣和中進士嘗從學劉安世操行端方紹興初召試翰林兼史館校勘命瑄刪定舊史修執政出知嚴州

小菑字子禮晉陵人紹興中進士第二累官至右射同中書門下平章事兼樞密使時有手詔議大興兵廷臣或主和或主恢復使菑決之菑奏天時人事未至拂上意尋除觀文殿大學士知紹興府

葛勝仲字魯卿丹陽人紹聖四年進士調杭州司理參軍林希薦試學官及詞科俱第一尋知汝州李彥括田破產者衆勝仲請蠲不當括者彥怒劾勝仲上寢其奏改湖州尋徙鄧州朱勔先求白雀之屬勝仲不與媒孽罷歸建炎中范宗尹為相凡前日以朋附被罪遠貶者咸赦還復知湖州時群盜縱橫聲搖諸



郡勝仲脩城郭作戰艦閱士卒賊知有備引去歲大  
饑發倉廩賑之民賴以濟紹興元年乞祠歸卒謚文  
康

孫覲字仲益晉陵人舉進士文章不為俗態靖康中  
為執法為詞臣旋由瑣闥歷吏戶長貳知秀州温州  
臨安諸郡其章疏制誥表奏明辯駿發每一篇出世  
爭傳誦紹興以後遭值口語出居象郡久之歸隱太  
湖上時年已邁為文屬辭少吐所不逮孝宗朝嘗命  
編類蔡京王黼等事實上之史官年九十餘卒所  
有鴻慶集行于世

蔡字立義宜興人紹興中為侍御史欲奏論戶部  
尚書梁汝嘉汝嘉致辭於秦檜出檜知湖州檜嘗怒  
未已又易平江值兩浙運使李椿年即平江行經界  
法欲增田租三十萬蔡辨其不可忤椿年椿年還都  
希檜意奏蔡在郡宴金使飲食臭敗致金人有詞遂  
落職罷任蔡謝表有二云雖軍夫是供各盡其職耳然  
王事有缺是誰之過歟自是投閒十五年後卒官叅  
知政事謚簡惠

袁樞字穰仲建安人試禮部詞賦第一調温州判官  
除太學錄求外補出為嚴州教授居常喜誦司馬光



資治通鑑古其浩博乃區別其事而貫通之號通鑑紀事本末

盧知原字行之德清人高宗初知溫州甚得民紹興二年以徽猷閣待制知臨安府奏乞撥兵馬鈐轄司回易庫歸臨安府從之尋除宮祠

梁汝嘉字仲謀麗水人歷守明溫台婺諸郡皆有政聲初言金人難與和親及東京留守孟庾不可任因忤用事臣意諷言者劾之未幾金果背約孟庾亦以東京降如其言終實文閣學士致仕嘗曰以清自處子孫家居鄰郡學捐地基以創齋廬至今繪像于學

禮之

張澄紹興初爲臨安知府逢迎便捷敏于應辦苟可媚上不恤民艱希附秦檜望風趨承胡銓上疏論和議觸檜怒謫銓涪州下臨安遣發澄械銓送貶所司諫晏敦復謂澄曰銓論宰相天下共知祖宗時以言事被謫爲開封者必不如是澄亦有愧色後知紹興再知臨安改知溫州所至委曲流俗以邀時譽

李寶河北人嘗陷于金時淮浙姦民倪詢梁簡等教金人造舟且爲鄉導寶拔身自海道來歸紹興三十年九月召對詢以北事歷歷如數乃以寶爲浙西副



總管令於平江督海舟捍禦明年十月金主亮渡淮分軍數萬圍海州寶與知州魏勝合擊大敗之遂與其子公佐引舟師至膠西石曰島敵舟已出海口操舟者皆中原遺民遙見寶舡給敵兵入舟中無復行次寶命火箭射之延燒數百艘降其衆三千餘人斬其將完顏鄭家等六人擒倪詢等上于朝獲其符印器甲糧斛以萬計時虞允文又大敗金人于采石金亮王瓜洲爲其下所殺三十二年春山東人耿京起兵復東平遣其將辛棄疾來朝京尋爲其部將張安國所殺棄疾乃約寶徑趨京營即帳中縛安國獻

臨安斬之金人復攻海州魏勝告急于寶寶命張安國蓋率銳卒數千助勝等力戰賊又大敗未幾孝宗即位用史浩爲相寶等功名遂不終云

顏師魯字幾聖漳州龍溪人紹興中進士累官監察御史尋改使浙西後法敝甚細民遇役輒破家師魯下教屬邑預正流水籍稽其役之序寬比限免代輸咸便安之鹽課歲百鉅萬久不給私鬻禁不可止刑辟日繁師魯擢帑緡盡償宿負戒官吏毋侵移比旁路課獨最上謂執政曰儒生能辦事如此農民有墾曠土成田未及受租者姦豪多爲已利師魯奏但當



正其租賦不應繩以盜種奏可遂著為令

趙不怠字仁仲濮王宗暉曾孫初補保義郎紹興二十七年舉進士易左宣義郎調婺州金華丞治縣豪何汝翼滅請於郡編錄他州邑人憎服累進明州觀察使居官所至有聲其所敬者朱熹張栻栻死為請謚又請用熹其好尚如此

錢端禮台州人紹興三十年以右中大夫充祕閣脩撰兩浙計度轉運副使知臨安府改除戶侍以直敷文閣黃仁榮知臨安府九月端禮再知初命臨安府印造會子許於城內外與銅錢並行端禮乞令

庫應支見錢並以會分數品搭用後從之東南用會子自此始

洪興祖字慶善鎮江丹陽人少讀禮至中庸頓悟性命之理績文日進登政和上舍第為湖州士曹宣教郎紹興四年蘇湖地震興祖時為駕部郎官應詔上疏具言朝廷綱紀之失為時宰所惡主管大平觀直敷文閣興祖好古博學自少至老未嘗一日去書著老莊本旨周易通義繫辭要旨古文孝經序贊離騷楚詞考異行于世

翁蒙之常山尉時趙鼎喪自鎖表歸郡守章傑檄蒙



之取其私書將以媚執政蒙之不從士論多之  
朱敦儒字希真河南人爲布衣時初有朝野之望累  
召皆固辭紹興中詔下故人勸之始幡然而起累遷  
兩浙提典刑獄敦儒素工詩及樂府時秦檜當國先  
用敦儒子爲刪定官復除敦儒爲鴻臚少卿檜死敦  
儒亦罷談者謂敦儒老牛懷舐犢之愛而畏避竄逐  
故其節不終云

葉衡字夢錫婺州人有才智紹興末知於潛以善政  
稱然不十年至宰相進用之驟人謂出於魯覲淳熙  
二年孝宗宴于玉津園謂衡等曰朝廷用人止論其

賢否如何不可有黨如唐之牛李其黨相攻四十年  
不解皆緣主聽不明所以至此文宗乃言去河北賊  
易去朝中朋黨難朕常笑之爲人主者但公是非  
何緣有黨又曰近來士大夫好倡爲清議此語一出  
切恐相師成風便以趨事赴功者爲猥俗以矯激沽  
譽者爲清高駸駸不已如東漢激成黨錮之風深害  
治體豈可不戒司諫湯邦彥奏衡有訕上語尋罷



浙江通志卷三十

官師志第五之十

吳芾字明可僊居人舉進士遷秘書省正字與秦檜故舊至檜專政芾退然如未嘗識檜疑之風言者論之出判處婺越三郡遷知處州處舊苦丁絹重芾損之以新丁補其額除監察御史勸高宗專務脩德求合乎天地無愧乎祖宗則人心悅服天亦助順矣兩淮戰不利廷臣爭陳退避計芾言今日之事進爲上策退爲無策旣而車駕駐建康芾請遂駐蹕以係中原之望且言建康控帶襄漢可以經理淮甸應接梁



宋臨安所不若也尋知臨安權豪歛戢嘗曰視官物當如已物官事當如私事與其得罪百姓寧得罪上官立朝不偶晚退閑者十四年自號湖山居士爲文豪健峻整有表奏五卷詩文三十卷

王信字誠之麗水人紹興三十年進士孝宗時爲考功郎官有三蜀士礙式應免時相爲囑信持弗聽上聞之謂尚書蔡沉曰考功得王信銓曹遂清遷太常少卿權中書舍人信遇事剛果論奏不避權要由此人多嫉之信亦力求去旣而起知湖州據按剖折敏如流泉擢集英殿脩撰知紹興府兼浙東安撫使奏

免逋官錢十四萬絹七萬疋綿十萬五千兩米二千萬斛山陰境有狹狝湖四環皆田歲苦潦信創啓斗門導停渚汪之海築十一壩化匯浸爲上腴民繪象以祠更其名曰王公湖築漁浦隄禁民不舉子買學田立義冢衆職脩理尋上章請老以通議大夫致仕喻樗字子才其先南昌人初愈藥仕梁位至安州刺史武帝賜姓喻後徙嚴州樗其十六世孫也少從龜山楊時游獨得其奧舉建炎進士累官工部郎中當紹興間力主正論爲時師表天下稱之孝宗即位用爲提舉浙東常平以治績聞所著有易義及玉泉講



解語孟大學四書性理窟行于世

辛次膺字起季萊州人紹興中以直秘閣知婺州清苦自持有善政隆興元年六月遷同知樞密院事對孝宗曰王十朋除侍御史雖上親擢天下皆知臣薦其賢湯思退召將至亦知臣嘗疏其奸臣與思退理難同列孝宗曰有謂思退可用者次膺對曰思退固不足道竊恐有誤國家事耳屢以足疾求去加秘閣脩撰致仕

李兼宣城人博學工詩揚萬里推許之知台州居官有守既卒吏民爲之巷哭罷市所著有詩文及郡志薛抗字君平常州武進人隆興初爲寧海令清俗甚有政譽邑濱海水鹵民甚苦之公于邑東北廣度坊側鑿井得泉甚甘爲亭於其上以便民汲自後次第凡開八井邑人利賴咸以公姓名之曰薛公井嘉定間郡守齊碩因民思公不已乃爲文以記之見地里志子極公爲令時所生蓋隆興二年也

唐闕字進道山陰人舉進士兩浙歲饑詔以闕爲浙東檢察使時州縣賑濟勒民減價而糶豪右往往閉糶閱奏儲粟之家宜勿限以價勿計以數則趨利之徒將傾困競售不待低昂而價自平民饑不相保小



兒遺棄衢路國法三歲以下許異姓收育闕請雖及  
十歲權聽民鞠養以爲己子孝宗可之於是全活甚  
衆

程大昌字泰之徽州休寧人紹興二十一年進士著  
十論言當世事獻於朝擢太平州教授明年召爲大  
學正秘書省正字孝宗即位遷著作佐郎歷浙東提  
點刑獄會歲豐酒稅踰額有挾朝命請增額者大昌  
力拒之曰大昌寧罪去不可增也徙江西轉運副使  
大昌曰可以興利去害行吾志矣光宗嗣位徙知明  
州尋奉祠

程叔達黟人嗜學至老不倦舉進士典湖學後以  
時弊擢爲御史賑濟二浙甚有勞績除右正言遷左  
司諫累官華文閣直學士卒諡莊節所著有玉堂等  
集

薛良朋隆興二年以兩浙轉運副使知臨安府警戢  
盜賊究心職事除直龍圖閣

劉銓字全之樂清人進士隆興中知海鹽大水害稼  
被檄檢傷放秋苗數萬斛貧不能輸者請于朝得停  
閣勸富人發廩賑飢民無畊資貸于郡給之學舍久  
廢徹圭租二百斛倡修之政務循良飾以儒術耻於



求名

李彥穎字秀叔德清人紹興十八年進士爲餘杭主簿調建德丞時宰知其才將處之博士或勸一見彥穎耻自獻不往調富陽丞歷知紹興府勤約有惠政尋知婺州捐屬縣稅十三萬緡人皆德之累官觀文殿學士致仕彥穎自奉澹約與州縣了不相聞卒年八十一

林光朝字謙之莆田人再試禮部不第聞吳中陸子正嘗從尹焞學因往從之游自是專心聖賢踐履之學通六經貫百氏言動必以禮四方來學者無慮數

百人南渡後以伊洛之學倡東南者自光朝始然未嘗著書惟口授學者使之心通理解嘗曰道之全體全乎太虛六經既發明之後世注解固已支離若復增加道愈遠矣孝宗隆興元年光朝年五十進士及第以集英殿脩撰出知婺州多善政

施師點字聖與上饒人爲臨安府教授乾道元年陳康伯薦賜對言歷年屢下詔恤民而惠未加浹陛下軫念惟恐一夫失所郡邑搜求惟恐財賦不集毋惑乎日降絲綸恩不霑被細民旣困於倍輸又困於非法重以歲惡室且懸磬租不如期積多逋負今明堂



肆赦戶自四等以下逋自四年以前願悉除免上曰非卿不聞此言詔從之

丁銳會稽人秀州司戶在官著仁政活民書二卷行世

李祥字元德常州無錫人隆興元年進士爲錢塘縣主簿時姚憲尹臨安邏者以巧發爲能每事下有司必監視鍛鍊囚服乃已嘗誣告一武臣子謗朝政鞫于獄祥不使邏者入門既而所告無實具以白尹尹驚曰上命無實乎祥曰即坐譴自甘憲具論如祥意上曰朕旣誤矣卿吾爭臣也遂賜憲出身爲諫大夫

祥調濠州錄事參軍

龔興湘陰人乾道五年進士剛介廉潔爲浙東檢法隨憲按部郡饋遺皆不受憲聞大慚以其已受者還之後知萍鄉民戶逼官賦興以已俸代輸終福建運幹身後家無檐石之儲

王希呂字仲行宿州人南渡後自北歸南寓居嘉興乾道五年舉進士授秘書省正字歷兵部吏部尚書以端明殿學士知紹興府希呂天性剛勁遇利害無所回護惟是之從居官廉潔歸老至無屋可居

張棡字敬夫廣漢人浚之子也學者稱爲南軒先生



以理學爲朱熹呂祖謙之友乾道五年以直秘閣知睦州奏蠲丁鹽錢絹民甚德之旅名山斥淫祠其治不嚴而威不疾而速一以教化爲先務凡所作用皆儒者事

趙善堅宋宗室家於袁州乾道間舉進士嘗通判婺州朱熹爲常平使者深器重之時大旱善堅奉行荒政全活甚衆後五典名藩所至以廉能稱官至戶部尚書

孟浩宜春人乾道間知武寧縣有聲累遷知湖州以忤權貴罷後復起官至直秘閣爲人廉介一毫不妄

暇予爲文章有法度所著有魁枝集

王炎歙縣人爲潭州教授以薦知湖州炎初著易雖未竟而病篤夜分祝天曰願湏更無死以成此書病少瘥書成果卒

林藏字子禮吳人舉進士乾道中爲浙東提舉常平

五年知秀州所至有善政博學高才尤長于漢隸

錢孜嘉禾人淳熙四年爲昌化令與舉學校與錢冰

卞園齊名元凌縉唐山紀事有美政思錢卞之句

陳驊福唐人淳熙五年知淳安創義倉募義役興滯

補廢民甚便之



顏度字魯子淳熙九年自朝奉大夫直寶文閣知湖州度旁通釋氏典每以善惡果報之說喻人人不忍欺凡聽訟於純朴中時出智巧多得其情

丘密字宗卿江陰人隆興元年進士第三人除國子博士孝宗召對密言恢復之志不可忘恢復之事未易舉乾道間知秀州時華亭捍海隄廢鹹潮壞田密奏乞荆隄馮鹵所築合東西兩岸塘凡八十四里爲蘇湖秀三州無疆之利累官同知樞密院事謚文定韓彥質淳熙中守嘉興遇事精敏無阿私姦猾畏憚既政成優游撫馭郡以無事

施宿字武子長興人知餘姚縣以興廢舉墜加意風教市田置書教誨學者姚北瀕海歲役民修堤民甚苦之宿爲石堤建莊田二千畝以備修堤之役功與前令謝景初同稱

余端禮字處恭龍游人進士知烏程縣民間賦丁絹錢率三氓出一縑不輸絹而折其估一縑千錢後增至五千錢民不能勝端禮疏聞於朝歲蠲民緡錢六萬時孝宗志在恢復端禮言謀敵決勝之道有聲有實而古之投機者有四有投隙之機有擣虛之機有乘亂之機有承弊之機上喜曰卿可謂通事體矣後



以觀文殿大學士判慶元致仕

楊玉休象山人幼肄業僧舍雪積其背而不自覺乾道中舉進士仕為黃巖尉禁戢奸豪人稱鐵面少府累遷至禮部侍郎

蕭燧字照鄰新喻人紹興十八年授平江府推官二十三年秦檜親黨密告燧秋試必主文曹臺燧詰其故曰丞相有子就舉欲以屬公燧怒曰敢欺心至是邪檜懷之既而不預校文秦煝果中前列燧浮沉州縣十餘年淳熙中累遷至國子司業刑部侍郎出知嚴州嚴地狹財匱燧儉以足用二年之間積至十五

萬以其美補積逋諸邑皆寬尋移婺州歲旱浙西平司請移粟于蘇燧謂東西異路不當與然安忍少視舊治之災為請諸朝發太倉米賑之

謝深甫字子肅臨海人舉乾道二年進士為嵯縣尉歲飢有死道旁者一嫗哭訴曰吾兒也傭于某家遭掠而死深甫疑焉廉得嫗子匿於他所嫗驚伏曰某與某有隙賂我使誣告耳皆抵誣罪自是人不敢欺為浙曹考官一時士望皆在選中曰文章有氣骨可望而知調知青田侍御史葛邲頡師魯文薦之孝宗召見深甫言今日人才枵中侈外者多妄誕矯訐沽



激者多眩鬻激昂者急于披露而或鄰工好夸剛介者果于植立而或鄰于太銳靜退簡默者寡有所合而或鄰于立異故言未及酬而已齟齬事未及成而已挫抑於是趨時徇利之人專務身謀習爲軟熟因緣攀附遂至通顯施施自得氣焰凌人一有緩急莫可倚仗臣願任使之際必察其實其人果賢則涵養之以蓄其才振作之以厲其氣栽培封殖勿使沮傷上嘉納之除大理永江東大旱擢爲提舉常平講行荒政所全活者一百六十餘萬人累官右丞相致仕有星隕于居第

婁機字彥發嘉興人乾道二年進士爲鹽官尉以治績聞調於潛縣丞輕賦稅正版籍簡獄訟興學校改知西安縣巨室買地爲塋域發地遇石復索元價機曰設得金將誰歸遷秘書郎請續編中興館閣書目時皇太子始就外傳以機兼資善堂教授日陳正言多所裨益

王極字會卿湖州人淳熙中爲令律已清介蒞事明敏差役公罕獄訟清簡興學養士風俗丕變

樓鑰字大防鄞人試教官調温州教授後爲郡守淳熙十四年以朝散郎知温州屬縣樂清倡言方臘之



變復起邑令捕數人歸于郡鑰曰羅之則無可坐縱之則惑民編隸其爲首者驅其餘徒出境民言遂定在任興學校勸農桑薦賢舉善興利便民尋召赴行在後官資政殿學士

熊克字子後建陽人幼好學善屬文紹興間舉進士知諸暨部使者芮燁以循吏目之孝宗時累官學士後出知台州克博聞強記著述外無他嗜所著有高宗紀事本末及九朝通畧帝王經譜諸子菁華

沈作賓字賓王歸安人以父任入仕判紹興府帥守丘密遇僚吏剛嚴作賓從容裨贊每濟以寬秩滿知

台州首訪民疾苦弛鹽禁寬租期均徭役更酒法先滯獄五十日間盡除前政之不便民者前守嫉其勝已巧媒藥之罷去民請于朝借留不遂爲立留賢碑後以煥章閣學士致仕

黃黼字元章餘杭人乾道間進士遷太常博士論對稱旨進秘書郎尋除兩浙轉運副使時浙東瀕海之田以旱澇告常平儲蓄不足黼捐漕計貸之毘陵民飢取糠粃雜草根爲食郡縣不以聞黼取民食以進乞捐僧牒緡錢濟之全活甚衆

李椿字壽翁洛州永平人熈寧安府視事三月竟以



權倖不便解去椿在朝遇事輒言執政故不悅及是轉對又言君以剛健爲體而虛中爲用臣以柔順爲體而剛中爲用陛下得虛中之道以行剛健之德矣在廷之臣未見其能以剛中守柔順而事陛下者也執政滋不悅出知婺州

危禎字逢吉臨川人舊名科淳熙進士孝宗更名禎嘉定中遷著作郎上言國家治亂之故及柴中行去國禎賦詩送之以是多忤宰相調臨安府教授出知湖州後知漳州請祠歸與鄉老爲真率會所著有巽齋諸集諸經講義及編輯先賢奏議

吳柔勝字勝之宣州人幼聽其父講伊洛書已知有持敬之學不妄言笑長游學人皆憚其方嚴登淳熙八年進士調都昌簿丞相趙汝愚知其賢調嘉興府學教授將寘之館閣會汝愚去御史湯碩劾柔勝嘗救荒浙右擅放田租爲汝愚收人心且主朱熹之學不可爲師儒守口是閒居十餘年嘉定初起遷國子正於是伊洛之學晦而復明

張初淳熙十一年以承議郎直徽猷閣兩浙運副知臨安府撫貝戢奸恩威並用奏餘杭水傷及免諸縣舊道民歌舞之張師尹婦女掖庭特以恣橫杓繩以



法徙家信州悉散其黨內侍毛伯益占西湖菱池與外戚交爭獄具會緣求免杓曰吾官可去法不可屈奏論如律

劉珙字共父子羽之子也監紹興府都稅務請祠歸村門力學不急仕進改衢州不赴

傅伯成字景初吏部員外郎察之孫少從朱熹學登隆興元年進士調連江尉試中教官科授明州教授以年少嫌以師自居日與諸生論質往復人才多因成就

周必大字子充廬陵人紹興二十年進士又中博學

宏治中太學錄召試館職歷官觀文殿學士進少傳先是監臨安府和劑局失火延燒民居其發火之家皆繫獄必大歎曰豈惜一官而不救人乎乃自誣服衆遂得釋人皆德之平生志行具見宋史本傳金安節知嚴州除浙西提刑赴召首言治民之道先德後刑今守令於簿書期會賦稅輸納窮日力辦之而無卓然以教化爲務者願申飭守令自今勿得甘爲俗吏朝論稱之

徐龜年崇德人淳熙末舉進士累官監察御史抗疏言士大夫之邪正實關風俗之美惡士人有廉耻則



下美風俗矣以直華文閣知温州習倍爲之一變  
不韶字彥淳慶元府人淳熙中進士歷官左司郎中  
許接伴金使使者索歲幣語慢甚韶曰昔兩國誓約  
止令輸燕不聞在汴使者語塞遷臨安府尹幾十年  
一訟精簡道不拾遺平反冤獄甚多後拜浙西制置  
使仍治臨安士民雖獯黠者亦知愛戴初韶父爲郡  
小吏五十無子其妻資遣往臨安置妾旣得妾察之  
有憂色外飾以絲而中寔以麻束髮問之泣曰妾故  
趙知府女也家四川父沒家貧鬻妾以爲歸葬計  
如送還之聘財之外又以囊中貲盡與之明年其

生節

李芾字叔章衡陽人淳熙中知德清縣屬浙西饑  
置保伍賑民活數萬計邑有妖人扇亂附和者衆遣  
芾討之盜聞其來立解散後爲湖南提刑死節

趙漢字伯遠淳熙間爲長興令邑蝗漢募民搜捕至  
三千餘石又大旱河竭穀價騰踊漢出官錢增直糴  
粟粟商輻輳人皆得濟又增學租以造就人才士民  
咸德之

耿秉爲新城令厲廉隅勤政事興學校和民人去煩  
役除重課百姓懷之立祠以祀



胡朝穎淳安人歷官武昌令通判嘉興時鄭清之家  
奴暴橫執寘諸法移書謝云以天子之命官撻宰相  
之奴僕罪當避位清之得書以聞帝喜曰得一佳士  
矣除守岳州



